

БОСНА И ХЕРЦЕГОВИНА  
ПАРЛАМЕНТАРНА СКУПШТИНА  
БОСНЕ И ХЕРЦЕГОВИНЕ




ДОМ НАРОДА  
ПРЕДСТАВНИЧКИ ДОМ  
Зajедничка комисија за одбрану и безбједност  
Босне и Херцеговине

BOSNA I HERCEGOVINA  
PARLAMENTARNA SKUPŠTINA  
BOSNE I HERCEGOVINE

DOM NARODA  
PREDSTAVNIČKI DOM/ZASTUPNIČKI DOM  
Zajednička komisija za odbranu i sigurnost  
Bosne i Hercegovine  
Zajedničko povjerenstvo za odbranu i sigurnost  
Bosne i Hercegovine

Broj: 03/1-50-14-7-7/24  
Sarajevo, 29. 9. 2023.



**ČLANOVIMA ZAJEDNIČKE KOMISIJE ZA ODBRANU I SIGURNOST BiH:**

JASMINU IMAMOVIĆU, MARINI PENDEŠ, RADOVANU KOVAČEVIĆU, DARKU BABALJU, MILANU DUNOVIĆU, SLAVKU MATIĆU, SANJI VULIĆ, ŠERIFU ŠPAGI, KEMALU ADEMOVIĆU, SREDOJU NOVIĆU, ZDENKU ČOSIĆU, SAFETU SOFTIĆU

**PREDMET: Informacija o učešće članova Zajedničke komisije za odbranu i sigurnost BiH u obilasku jedinica i komandi Oružanih snaga BiH, Regionalnog ureda Granične policije BiH Sjeverozapad-Gradiška i TROM Doboj, 25. i 26. 9. 2023, dostavlja se**

Zajednička komisija za odbranu i sigurnost BiH, u svojstvu nadležne komisije Parlamentarne skupštine BiH i u skladu sa usvojenim Orijentacionim radnim planom za 2023. godinu, 25. i 26. 9. 2023. radno je posjetila Komandu 6. pješadijske brigade OSBiH locirane u Banjoj Luci, Regionalni ured Granične policije BiH Sjever, TROM Doboj te je razgovarala s čelnim ljudima Zajedničkog štaba OSBiH.

Jasmin Imamović, predsjedavajući, Sanja Vulić i Slavko Matić, članovi Zajedničke komisije, Boško Šiljegović, parlamentarni vojni povjerenik BiH, Ljiljana Milićević, sekretarka, Željko Grubešić, stručni savjetnik, i Sanja Čavarkapa, stručna saradnica u Uredu sekretara, učestvovali su u obilasku i radnim posjetama navedenim komandama i agencijama.

Radna posjeta članova Zajedničke komisije za odbranu i sigurnost BiH jedinicama i komandama OSBiH realizirana je uz podršku Misije OSCE-a u BiH s ciljem unapređenja demokratske kontrole i parlamentarnog nadzora sektora odbrane i sigurnosti.

**25. 9. 2023. Kasarna Kozara, Banja Luka**

O stanju i aktivnostima u **Komandi i jedinicama 6. pješadijske brigade OSBiH**, locirane u Banjoj Luci, članove Zajedničke komisije upoznao je brigadir Radovan Jović, komandant brigade.

U svom izlaganju brigadir Jović posebno je govorio o strukturi, razmještanju, stanju personala, te stanju na lokacijama jedinica i komande.

Konstatirana je nedovoljna popunjenost brigade po svim kategorijama, česta fluktuacija personala, neriješena statusna pitanja, posebno za lica koja se angažiraju na vježbama i u

terenskim uslovima rada. Upozoreno je i na probleme s logističkim osiguranjem, posebno sa osiguranjem energenata za grijanje, kao i s rješavanjem viškova naoružanja i vojne opreme.

Članovi Zajedničke komisije tokom posjete upoznati su i sa osnovnim zadacima brigade, kao i s tokom vježbe „Dinamični odgovor 2023“. Naglašen je značajan angažman brigade u izvođenju vježbi koje se planiraju u naredna dva mjeseca. Istaknuto je da Komanda 6. pješadijske brigade ulaže velike napore u održavanju ključne infrastrukture, te upozoreno na evidentne probleme u osiguravanju rezervnih dijelova i obnove objekata za smještaj vojnika i skladišta naoružanja i vojne opreme.

Potom je, na istoj lokaciji u Kasarni Kozara, **održan sastanak članova Zajedničke komisije sa Zajedničkim štabom OSBiH, generalima i komandantima jedinica i komandi ranga brigade i više.**

Sastanku su prisustvovali zamjenici načelnika Zajedničkog štaba OSBiH generali Ivica Jerkić i Gojko Knežević, komandanti komandi i brigada OSBiH, kao i drugi najodgovorniji visoki oficiri OSBiH, među kojima i generalni inspektor Generalnog inspektorata Ministarstva odbrane BiH brigadni general Mirsad Ahmić.

Zamjenik načelnika OSBiH general-major Ivica Jerkić detaljno je upoznao članove Zajedničke komisije za odbranu i sigurnost BiH i parlamentarnog vojnog povjerenika BiH sa stanjem u OSBiH.

Posebno je bilo riječi o statusu personala, obukama i vježbama, operacijama u zemlji i inozemstvu, odnosno međunarodnom angažiranju OSBiH, bilateralnoj i multilateralnoj saradnji, realizaciji obaveza iz oblasti kontrole naoružanja, kao i o drugim važnim pitanjima kakvo je budžet, te status dokumenata Pregled odbrane, Plan razvoja i modernizacije, te Program reformi.

Tokom sastanka konstatirano je da je snabdijevanje OSBiH i dalje jedan od značajnih problema OSBiH. Također je upozoreno i na već nekoliko godina izraženi problem grijanja u objektima u kojima rade i borave pripadnici OSBiH, kao i na problem nedostatka sredstava za održavanje perspektivnih lokacija OSBiH. Istovremeno, ukazano je i na velike troškove personala u strukturi budžeta za odbranu, zbog čega, kako je rečeno, s raspoloživim sredstvima nije moguće provesti Plan modernizacije OSBiH.

#### **25.9.2023. Regionalni ured Granične policije BiH Sjeverozapad – Gradiška**

Nakon službene posjete jedinicama i komandama lociranim u Banjoj Luci, predsjedavajući Zajedničke komisije za odbranu i sigurnost BiH Jasmin Imamović, članovi Zajedničke komisije Sanja Vulić i Slavko Matić, te parlamentarni vojni povjerenik BiH Boško Šiljegović posjetili su Regionalni ured Granične policije BiH (GP BiH) Sjeverozapad – Gradiška.

Zamjenik direktora GPBiH Ensad Korman, pomoćnik direktora Dragan Kulić i načelnik Regionalnog ureda GPBiH Sjeverozapad-Gradiška Suad Kasupović upoznali su članove

Zajedničke komisije s aktuelnim stanjem u GPBiH, te sa stanjem na granici u zoni odgovornosti Regionalni ured Sjeverozapad – Gradiška.

Razgovarano je o uslovima rada graničnih policajaca, kao i o trenutnim problemima u radu. Kako je rečeno, najizraženiji problem u GPBiH je velika kadrovska nepopunjenost, budući da nedostaje 600 graničnih policajca, zbog čega se, kako je naglašeno, čini sve da se osposobe novi kadrovi. S tim u vezi, članovi rukovodstva GPBiH istaknuli su da Direkcija za koordinaciju policijskih tijela BiH, Državna agencija za istrage i zaštitu (SIPA), MUP Republike Srpske, kao i kantonalni MUP-ovi pomažu GPBiH da prevaziđu sadašnje probleme u nedostatku policajaca, što je, kako je upozoreno na sastanku, posebno izraženo u sprečavanju ulaska ilegalnih migranata.

Naglašena je veoma dobra saradnja s graničnim policijama susjednih zemalja. Prema riječima članova rukovodstva GPBiH, problemi s ilegalnim migrantima su pod kontrolom i čini se sve da ih bude što manje. Istovremeno, kako su rekli, u toku su intenzivne aktivnosti na suzbijanju prekograničnog kriminaliteta, kao i aktivnosti u vezi s nabavkom nove opreme i uniformi za pripadnike GPBiH.

Čelni ljudi GPBiH i Regionalnog ureda Sjeverozapad-Gradiška ocijenili su da bi izmjene i dopune Zakona o policijskim službenicima, te dogradnja Pravilnika o unutrašnjoj organizaciji i niza drugih podzakonskih akata bili neophodni za ubrzanje procesa popune GPBiH s ciljem efikasnijeg terenskog rada i snažnije borbe protiv prekograničnog kriminala i ilegalnih migracija.

#### **26.9.2023. Poligon za borbenu obuku OSBiH-Manjača**

Članovi Zajedničke komisije i parlamentarni vojni povjerenik BiH razgovarali su s predstavnicima **Komande 5. pješadijske brigade OSBiH** (sa sjedištem u Tuzli), čiji pripadnici na Manjači izvode vježbovne aktivnosti u sklopu vježbe „Dinamičan odgovor 23.“

Komandant brigade brigadir Emir Kliko sa saradnicima upoznao je članove Zajedničke komisije i parlamentarnog vojnog povjerenika BiH sa stanjem u brigadi, kao i s aktivnostima koje se izvode na poligonu za borbenu obuku na Manjači.

Tokom obilaska bataljonske grupe lake pješadije iz sastava 5. pješadijske brigade OSBiH, članovi Zajedničke komisije i parlamentarni vojni povjerenik BiH obišli su i komandno mjesto brigade, koje se nalazi u zoni izvođenja završnog dijela vježbe „Dinamični odgovor 23.“

Komandant Komande i doktrine OSBiH brigadir Slaven Glavicki u ulozi direktora vježbe upoznao je članove Zajedničke komisije s tokom i ciljevima izvođenja vježbe, te razmještajem jedinica na poligonu za borbenu obuku Manjača.

U ime Zajedničkog štaba OSBiH, članove Zajedničke komisije za odbranu i sigurnost BiH i parlamentarnog vojnog povjerenika BiH pozdravio je i zamjenik načelnika Zajedničkog štaba OSBiH general - major Gojko Knežević.

## 26.9.2023. Radionica za održavanje i uništavanje municije i minsko - eksplozivnih sredstava (TROM), Doboj

Nakon posjete Poligonu za borbenu obuku OSBiH, članovi Zajedničke komisije Imamović i parlamentarni vojni povjerenik BiH posjetili su Radionicu za održavanje i uništavanje municije i minsko - eksplozivnih sredstava (TROM), lociranu u Doboj.

Posjeta ovoj lokaciji organizirana je s ciljem upoznavanja s organizacionom strukturom, misijom, personalnom formacijom i aktivnostima ove veoma bitne jedinice za funkcioniranje Oružanih snaga BiH.

TROM Doboj je savremena radionica iz sastava Komande logistike OSBiH, u kojoj se ispituje hemijska stabilnost baruta, te vrši demilitarizacija municije i minsko-eksplozivnih sredstava. U ovu savremeno opremljenu lokaciju i radionicu Misija OSCE-a u BiH i UNDP-a uložili su značajna sredstva s ciljem osavremenjavanja procesa u nadležnosti TROM-a.

O radu TROM-a i funkcioniranju logističke podrške, članovima Zajedničke komisije za odbranu i sigurnost BiH govorio je komandant Komande logistike OSBiH brigadir Ernes Heleg. Brigadir Heleg naglasio je da je bitno održati osnovne aktivnosti kroz izvršenje demilitarizacije rashodovane municije i minsko-eksplozivnih sredstava, održavati sadašnji nivo rada laboratorije za ispitivanje hemijske stabilnosti baruta, unaprijediti sigurnost lokacije, te vršiti stalnu obuku pripadnika jedinica za rad s municijom i minsko-eksplozivnim sredstvima.

Prema riječima brigadira Helega, Komanda logistike OSBiH ima izražene probleme s upražnjenim formacijskim mjestima, s neredovnim snabdijevanjem i održavanjem materijalno-tehničkih sredstava, kao i s nedostatkom zaštitne opreme za rad.

Radnoj posjeti članova Zajedničke komisije TROM-u Doboj i sastanku s rukovodiocima Radionice prisustvovali su zamjenik načelnika Zajedničkog štaba OSBiH general-major Gojko Knežević i zamjenik komandanta Komande za podršku OSBiH brigadir Rusmir Mrković.

Dostavljeno:

- naslovu
- a/a

